



Sesida dals

23 da favrer 2021

Communitgà ils

1. da mars 2021

Protocol nr.

179/2021

Dumonda da la fracziun da la PPS

concernent il rinforz da la forza idraulica en il Grischun

Resposta da la Regenza

La produenziun d'electricitad cun ovras idraulicas importa en Svizra en la media da blers onns 36,5 uras da terawatt (TWh). Cun quai contribuescha ella actualmain var 56 pertschient da la produenziun d'electricitad totala da la Svizra. Passa in tschintgavel da la produenziun d'electricitad svizra cun ovras idraulicas deriva dal chantun Grischun. Er la Regenza è da la medema opiniun sco quella represchentada en la dumonda, che la forza idraulica haja ina gronda impurtanza energetica e per l'economia publica da noss chantun. Grazia a l'utilisaziun da la forza idraulica indigena restan mantegnidas plazzas da lavur en las valladas ed en las regiuns perifericas, ed i vegnan generadas incumbensas per l'industria e per la mastergnanza locala. Il niz per l'economia publica va lunsch sur la pura produenziun d'electricitad ora. Plinavant è la Regenza conscienta da la gronda impurtanza finanziaria da la produenziun d'electricitad per las vischnancas e per il chantun.

Tar las dumondas 1, 2 e 4: Sin plaun federal prevesa la Lescha d'energia (LEn; CS 730.0) – ultra da la promoziun da las novas energias regenerablas – er contribuziuns d'investiziun per la forza idraulica. Ensemen cun ils chantuns da muntogna e cun ulteriurs intschess da l'aua s'engascha la Regenza fermamain che las cundiziuns generalas per l'utilisaziun da la forza idraulica vegnian meglieradas cun la concepziun futura dal martgà d'electricitad. La valur da la forza idraulica sco pitga principala dal provediment d'electricitad svizzer en il rom da la Strategia d'energia 2050 sto vegnir renconuschida e valurisada da la politica. Mai na dastga la forza idraulica trair la curta envers la fotovoltaica. Sche la forza idraulica è posiziunada bain (concepziun dal martgà d'electricitad), pon ils producents d'electricitad er pajar tschains d'aua adequats. Perquai che la finamira dal tschains d'aua è e resta la medema: el sto esser er a lunga vista ina indemnisaziun attractiva e gista per metter a disposiziun l'aua sco resursa. Per che la forza idraulica vegnia rinforzada en il chantun, elavura la Regenza actualmain ina strategia chantunala concernent la forza idraulica che cumpiglia tranter auter il return dals implants a la concedanta. Ultra da quai stat ella en in barat permanent cun la Confederaziun e cun la branscha, uschia ch'i pon

vegnir realisads er en l'avegnir ulteriurs projects ch'èn impurtants per la Strategia d'energia 2050 (cf. dumonda 6).

Tar la dumonda 3: La promoziun finanziaria da las differentas tecnologias da produziun è reglada sin plaun federal en la LEn. L'emprima prioritad ston avair las ovras idraulicas (d'accumulaziun) grondas, perquai che cun ellas po en emprima lingua vegnir serrada persistentamain la largia d'energia (durant l'enviern). Er impurtant èsi da mantegnair e d'optimar ovras idraulicas pitschnas existentas. Il potenzial da novas ovras idraulicas (ad aua currenta) fitg pitschnas, che na vegnan betg sustegnidas da la Confederaziun, è percunter modest, ed ina promoziun finanziaria na resguarda la Regenza perquai betg sco prioritara.

Tar la dumonda 5: Las vischnancas pon survegnir ina indemnizaziun per metter a disposiziun lur funs e lur terren per implants per la produziun d'electricitad (utilisaziun speziala dal terren). En divergenza da l'utilisaziun da la forza idraulica n'è la produziun d'electricitad u da chalur cun agid dal vent e dal sulegl per se però betg in'utilisaziun speziala, per la quala sto vegnir pajada ina concessiun, e monopols per quests bains comunabels n'èn motivads nagins. Las vischnancas èn libras da fixar ina participaziun vi dals implants da produziun (analogamain a las ovras partenarias tar la forza idraulica). Cun ina participaziun sistematica da las vischnancas pon vegnir avertas funtaunas d'entradas per las vischnancas da staziunament.

Tar la dumonda 6: Cun represchentanzas da la bransch, da las federaziuns da l'ambient e dals chantuns ha il Departament federal per ambient, traffic, energia e communicaziun (DATEC) convocà ina maisa radunda la stad 2020 per che las finamiras d'extensiun da la forza idraulica fixadas en la Lescha d'energia possian er vegnir cuntanschidas fin l'onn 2050. Da vart da la Confederaziun vegnan examinadas tranter auter ulteriuras promoziuns finanzialas per cuntanscher questas finamiras. Sco in dals chantuns ils pli impurtants da la forza idraulica s'engascha il Grischun activamain tant sin plaun politic sco er professiunal, e quai en spezial per ch'ils projects "Chlus" e "Lagobianco" possian vegnir realisads bainprest.



En num da la Regenza

Il president:

Dr. Mario Cavigelli

Il chancelier:

Daniel Spadin